

重修目錄

卷一

輿地志上

星野 晷度附

沿革表

疆域 城池公署附

川澤 橋梁附

古蹟 坊表附

卷二

輿地志下

村莊 市集廟會附

風俗

物產

卷三

田賦志

戶口

地糧

鹽課

雜稅附

卷四

學校志

學宮

學額

學田附

書院

考棚

社學

義學附

卷五

經政志

祀典

禮儀

慶典

倉儲

郵政

養濟院 留養局
惠民藥局 漏澤園

郵政

驛站

郵鋪

兵防

卷六

職官志

封爵表

職官錄

官師表

宦績錄

卷七

選舉志

薦辟

制舉

科目

進士 舉人 貢生
武進士 武舉 例仕 文職 武職

封廕

恩榜

卷八

人物志上

仕績

忠節

遇難附

孝友

義行

文學

隱逸

方伎

附載

卷九

人物志下

列女

節孝 賢懿
貞烈 難貞女

附載

卷十

藝文志

著述

金石

卷十一

雜稽志上

事略

祥異

卷十二

雜稽志下

陵墓

寺觀

識餘

甯津縣志卷八

光緒二十六年重修

人物志上

按晉書咸康七年實編戶正土斷白籍土斷者以土著之人爲斷白籍者本縣所編之籍可知土著之人皆憑本縣之籍甯津雖自戰國至漢皆爲臨樂邑且以建侯其南爲重平亦建侯然至東漢建武中臨樂乃省入南皮重平亦廢併入鬲是兩漢時縣人無本籍矣及曹魏復置新樂而孝昌中又裁以置重平東魏雖置胡蘇而高齊乃並重平胡蘇俱廢是魏晉北朝時縣人無本籍矣及隋復置胡蘇縣歷唐天寶改

名臨津而至宋熙甯初又以臨津省入南皮是唐宋
時縣人無本籍矣此正如魏書地形志云往時編戶
全無追訪者也又况前明靖難一舉千里無煙故今
所稱爲土籍者多爲明初所遷云志人物

仕績

漢

雋不疑字曼倩勃海人治春秋爲郡文學進退必以禮
名聞州郡武帝末暴勝之爲直指使者衣繡衣持斧
逐捕盜賊威振州郡聞不疑賢至勃海遣吏請與相
見不疑冠進賢冠帶櫛具劍佩環玦褰衣博帶盛服

至門上謁門下欲使解劍不疑曰劍者君子武備所以衛身不可解吏白勝之勝之開閣延請望見不疑容貌尊嚴衣冠甚偉乃躡履起迎登堂坐定不疑據地曰竊伏海瀕聞暴公子威名舊矣今乃承顏接詞凡爲吏太剛則折太柔則廢威行施之以恩然後樹功揚名永終天祿勝之敬納且問當世所施行門下諸從事皆州郡選吏相與側聽莫不驚駭至昏夜罷去勝之遂表薦不疑拜爲青州刺史久之武帝崩昭帝卽位而齊孝王孫劉澤交結郡國豪傑謀反欲先殺青州刺史不疑發覺收捕皆伏其辜擢爲京兆尹

賜錢百萬每行縣錄囚徒還其母輒問不疑有無平反平反多母喜笑飲食或無所出母輒怒爲之不食故不疑爲吏嚴而不殘始元五年有一男子乘黃犢車建黃旒衣黃襜褕著黃帽詣北闕自謂衛太子公車以聞詔使公卿將軍中二千石雜識視長安中吏民聚觀者數萬人右將軍勒兵闕下以備非常丞相御史中二千石至者立莫敢發言不疑最後到叱從吏收縛或曰是非未可知且安之不疑曰諸君何患於衛太子昔蒯瞶違命出奔輒拒而不納春秋是之衛太子得罪先帝亡不卽死今來自詣此罪人也遂

送詔獄

漢書

窮治乃本夏陽人姓成名方遂或云姓張

名延年居湖以卜筮爲事有故太子舍人常從之卜

謂曰子狀貌甚似衛太子乃詐稱請闕廷尉召其鄉

里識之遂腰斬

荀悅漢紀

天子與大將霍光嘉之曰公卿

大臣當用明經術者由是名重朝廷在位者皆自以

爲不及也光欲以女妻之不疑固辭不肯當久之以

病免終於家後趙廣漢爲京兆尹自言不及不疑遠

甚

漢書

甯津爲漢臨樂縣至光武省入南皮凡百六十餘
年故縣人皆隸南皮籍如雋不疑實甯津人其墓
現在大柳鎮猶有雋姓其裔也若此
外無冢可誌者不知湮沒幾許矣

元

安汝明甯津人延祐中尹定遠興利除害三年土闢戶

增賦均盜息民咸德之

安徽通志

明

張廉字清之剛介有守永樂初授戶部主事改知歸州

有豪黠猛虎爲人害前守不能禁廉至卽捕黠惡者

正其罪禱於神獲虎殺之招撫流移戶版日增州以

大治上官交章薦之擢知大理府仍署歸州事比秩

滿徑歸不復仕歸州人懷其德共祠祀之

河間府志

又崇

祀鄉賢祠

劉貴洪武四年充儀衛司校尉永樂初以扈駕功陞武
畧將軍彭城衛中所副千戶二年予世襲三年改常
山中護衛貴卒子浩襲職調羽林前衛中所正統九
年征熱水川殺賊有功陞正千戶浩孫瑄成化間累

功授羽林左衛右所

家乘
節略

都勝甯津人襲職南京羽林左衛指揮僉事成化初擢
署都指揮僉事備倭揚州擊敗鹽徒爲亂者尹旻等
舉勝將才乃命充參將協同漕運陝西大饑奉詔輸
米百萬石往賑之遷署都指揮使充總兵官代張信
總督漕運宏治中以都督僉事帶俸南京前府勝居

官廉靜歷任五十七年所處皆膏腴地而自奉簡淡

日食止豆腐時因以爲號云

明史

趙琪字廷玉本之子成化十六年貢任北城兵馬奉職
匪懈坊市肅清陞重慶府通判在任三年有能聲以

年老致仕民思之

舊志下同

王錦字尙綱簡之孫宏治八年貢初授盩厔縣訓導啟
迪不倦以恩義結諸士子有學行者待之尤加嘗捐
俸給貧生一時多所成就人以爲有蘇湖風丁外艱
歸起復授齊河訓導一以教盩厔者施之齊河稱言
行端而善教者必曰王先生云署齊河縣事縣爲藩

省衝劇旣受檄振厲風裁吏畏民懷上官嘉之陞樂平教諭便道歸謁遂不復出教子坪以義方爲訓其後嗣顯榮爲邑望族人謂善教啟之也

尙堂字來瞻正德丁卯科舉人歷任太原彰德府推官陞蘇州府通判蘇爲東南大郡賦稅甲天下農田水利郡政攸先堂始至訪民利弊而興除之政聲大著上官交章薦云一廉如水剖決如流將大用竟卒於官囊空至不能喪郡僚相與捐助其事始就歷任十餘年無異寒士眞廉吏也

侯爵字廷臣正德五年貢力學行善教人尤長於詩賦

授邾縣縣丞性清介人不敢干以私署縣事三月上官以催科不力劾之遂解官歸民歎曰三月居官一朝謝政居家惟治農賦詩教子而已子孫多所成立郭聰字上達正德七年貢性敏好學家貧淡如也動必循理人以郭循理呼之授金鄉訓導與士子恩義兼盡丁外艱起復補延安訓導口口事一一就緒上官薦以學裕教優才通政事生員孫景學等繪像日瞻拜之陞葭州學正口口州事綽有賢聲除豪橫革支應買棺葬生員劉儀捐俸助貧生不能娶者尤多尋陞成山衛教授後卒於官歷任二十餘年家道蕭然